

Reglas d'admissiun per classas da talents

Da las tractativas da l'ultima sesida da la regenza grischuna

■ (cc) La regenza ha approvà las novas reglas per la procedura d'admissiun per classas da talents. La regenza ha approvà la revisiun parziala da l'ordinaziun davart la procedura d'admissiun en classas da talent (OACT). Tut en tut datti quatter scolas che promovon talents grischuns da sport resp. da musica. Quai èn Cuir, Tavau, Glion e Champfèr. En ils ultims onns è la procedura d'admissiun per la recepciun en ina tala classa da talents sa mussada repetidamain sco memia pauc transparenta e chapaivla. Las midadas procuran pia plitost primarain per ina procedura pli concisa e sclereschan differentas dumondas ch'èn resultadas en la pratica.

La novaziun la pli impurtanta concerna la communicaziun davart la reussida da l'examen d'admissiun e davart la recepciun en ina classa da talents. Differentamain a la regulaziun vertenta trametta da nov l'uschenumnada gruppa directiva las decisiuns d'examen negativas. Fin ussa faschevan quai las scolas da talents. Quai ha chaschunà il passà pliras giadas per confusiuns. La gruppa directiva ch'èruiva fin ussa mo ils resultats dals examens sa cumpona da nov da duas representantantas u da dus representantants da l'associaziun chantunala respectiva. Vers anora duai quai procurar supplementarain per acceptanza e per trasparenza. Sch'i na dat betg avunda piazzas en la classa da talent respectiva è anc adina la scola da talents responsabla per la decisiun d'admissiun.



Scola da talents Surselva.

MAD

In'ulteriura midada pertutga la basa da valitaziun dals examens. En il futur duai il potenzial d'in talent esser pli fitg en il focus che sia prestaziun actuala. Per la valitaziun specifica dal potenzial duai

pia vegnir applitgà en il futur in instrument sviluppat da swiss olympic. L'emprima prioritad ha plinavant il potenzial, perquai che la nova ordinaziun introducescha ina valitaziun da las singulas parts

da l'examen. Empè da mintgamai in terz vegn l'examen validà da nov sco suonda: 40 pertschiend test dal potenzial, 30 pertschiend test da sport resp. da musica e 30 pertschiend test da la personalitad.